

BEREIKELIEN  
BEILEGRABFU  
CHUPPATIEN  
TER..KERAMIK  
PALAOLITHIKU  
ASSHANDEL  
NBLITZZEIT  
NILLER RÜME  
TUMER KULTP  
IEDLJINGEN

# CHATS E FATGS

# CHATS E FATGS

La noziun «archeologia» deriva dals plects grechs «archaios» (vegl) e «logos» (instrucziun). Ella vul dir uschè bler sco «enconuschientscha dal temp antic» u «scienza dal temp antic», sa referind adina a l'istorgia da l'uman e da ses conturns.

Oriundamain sa fatschentava l'archeologia cun las epocas senza scrittiras u cun epocas ch'èn povras da documents scrits, quai vul dir da la preistorgia e da l'istorgia tempriva (epoca romana). Quai uschenavant ch'ellas han pudì vegnir rendidas accessiblas tras exchavaziuns, pia cun render visibel ils contexts da chats archeologics. Quai pon esser culegnas entiras, dentant er restanzas da chasas, champs da fossas e foss. Autras restanzas da l'actividad umana èn per exempel plazzas da cult, chats da deposits e deposits da luadiras, er chats sco utensils e guaffens da crap, objects da metal, cheramica, artefacts dad ossa u rument d'ossa.

L'incumbensa e la finamira da l'archeologia è quella da chavar ora, da documentar e d'interpretar uschè bain sco pussaivel ils fatgs dals chats sco er ils chats sez. Els pussibiliteschan conclusiuns tar l'istorgia da l'uman e da ses conturns natirals, pia da far constataziuns istoricas.

Pli tard è la metoda archeologica vegnida applitgada er per epocas istoricas. Latiers tutga l'archeologia dal temp medieval, la perscrutaziun da chastels, l'archeologia da baselgia, la perscrutaziun da

centers da citads e schizunt l'archeologia industrialala. L'ultima s'occupa er da temas moderns, sco per exempel minieras, galarias da la miniera, furns da luentar, chaltgeras, produenziun da cheramica e da vaider sco er da divers aspects dal commerzi. Quest rom scientific tanscha per part fin en il 20avel tschientaner.

L'archeologia è ozendi ina scienza moderna che collavura stretgamain cun disciplinas da las ciencias natiralas. Latiers tutgan la botanica, la zoologia, l'antropologia, la climatologia, la geologia, la dendro-cronologia, la chemia e la fisica (dataziuns cun la metoda da C-14).

**L'archeologia en il Grischun** Già il 16. tschientaner devi umans en il Grischun che s'interessavan per l'archeologia. Ulrich Campell per exempel ha menziunà enturn l'onn 1570 las pitgas ed ils vials per chars sin il pass dal Gügli. In'activitad archeologica da rimnada po vegnir cumprovada per il cumenzament dal 19. tschientaner per il Welschdörfli roman da Cuira. L'onn 1869 è vegnida fundada la societad istorica antiquara e l'onn 1872 il museum retic. L'onn 1903 è cumparida la «Urgeschichte Graubündens mit Einschluss der Römerzeit».

In'emprima exchavaziun archeologica è vegnida fatga l'onn 1902 en la «Custorei» da Cuira (oz: piazza da la Stadthalle). Ulteriuras activitads archeologicas hai dà ils onns 1930 fin 1950 sut la direcziun dal selvicultur Walo Burkart. A questa era appartegnan er ils nums da Hans Conrad, Walter Sulser e Benedikt Frei.

Suenter ch'ina piazza da conservatur è vegnida stgaffida l'onn 1960 al museum retic, han er pudì vegnir fatgas exchavaziuns d'urgenza. Cun la fundaziun dal servetsch archeologic l'onn 1967 è s'augmentada fermamain l'activitad archeologica cun exchavaziuns voluminusas e cun numerusas publicaziuns.

# TEMP DA CRAP

600000 – 2200 avant Cristus

Il temp da crap è la perioda la pli lunga da l'istorgia da l'umanitad. Ses cumenzaments sa chattan – en quai che riguarda il territori da la Svizra – per gronda part anc en il stgir

**Temp da crap tempriv (paleoliticum)** Durant il temp da crap tempriv eran las valladas da las Alps cuvridas d'enormas massas da glatsch. Pervia da quai n'èsi strusch da spetgar ch'i dettia lieus da chat paleolitics u chats da quel temp. Mo a l'ur u sur ils glatschers èsi imaginabel da chattar objects ch'ils chatschaders d'urs da cuvels han pers en cuvels u sut spelms che servivan sco tetgs. Quai è per exempel il cas en il «Drachenloch» sur Vättis (SG) sin 2450m u en il cuvel d'Apollo sur St.Antönien-Partnun sin 2300m. Là han ins chattà utensils fitg simpels da crap e dad ossa, per part er fuclars.

Tranter il 14. ed il 12. millenni èn ils glatschers da la Val dal Rain luads. Alura è sa furmada in'emprima vegetaziun en la Val dal Rain grischuna. La selvaschina è immigrada nà dal nord en la Val dal Rain alpin. Seguind ils fastizs da la selvaschina èn arrivadas gruppas da chatschaders ils mais da stad. L'enviern vivevan quellas bain en la regiun dal Vorarlberg (radiolarit dal Grosses Walsertal e silex da la Baviera).

Da la fasa la pli tardiva dal paleoliticum derivan utensils da radiolarit, da silex e da cristal da muntogna da Cuira-Marsöl. Els dateschan dal temp tranter 11000 e 9500 avant Cristus.



**Temp da crap mesaun (mesoliticum)** Er dal temp da crap mesaun èn enconuschents mo paucs lieus da chat en il Grischun. Igl è significativ che la piazza da pussar dals chatschaders mesolitics-neolitics da Mesauc-Tec Nev sa chattava fin ad 8m sut il tschispet actual. Mo grazia a la construcziun da l'autostrada è ella vegnida scuvrida. Tar quest lieu da chat èn vegnids chattads blers artefacts elavurads da silex e vers 4000 stgaglias da silex e da cristal. Els derivan dal mesoliticum tempriv e tardiv. Ins ha er chattà in pèr tocs da cheramica e da silex dal neoliticum tempriv.

Culegnas e piazzas da pussar mesolitics sa chattan oz bain en il territori dal funs da la val sut bler material da boas e da sbuvadadas. U l'activitad dals flums ha destrui ellas definitivamain en il decurs dals millennis.

Percunter chattan ins adina pli savens piazzas da pussar da chatschaders en zonas alpinas. Uschia per exempel sin il Pian dei Cavalli (Valle San Giacomo, Italia, 2200 m) che na sa chatta betg lunsch davent dal Mesauc. Auters exempels enconuschents èn il Plan Canin en la Val Forno (en il sid da Malögia, 1990 m) u en il territori dal Lai da Rims (Val Müstair, 2400 m).

**Temp da crap tardiv (neoliticum)** Oz enconuschain nus tut en tut nov culegnas neoliticassas en il Grischun: Cuira-areal Zindel ed Ackermann, Vaz sut-Haselboden e Haselbodenkopf, Zizers-Friedau, Tumein-Crestis, Cazas-Petrushügel, Mesauc-Tec Nev e Castaneda-Pian del Remit. I sa tracta qua senza excepziun da culegnas pitschnas che n'èn strusch vegnidas abitadas pli ditg che 100 fin 150 onns. Entant che singulas da questas culegnas derivan anc d'in neoliticum tempriv fin sviluppà (5./4. millenni per Zizers, Cuira, Mesauc), appartegnan las ulteriuras culegnas plitgansch ad ina fasa tardiva dal temp da crap tardiv (3. millenni).

Interessanta è la cumprova d'ina cultivaziun dad ers cun araders a Cuira ed a Castaneda. Remartgabel è er il fatg che questas culegnas sa concentreschan sin las vals da transit situadas a bass (Val dal Rain, Tumleastga e Mesauc). Ina piazza da pussar neolitica è enconuschenta a Zernez-Ova Spin. Numerus èn chats singuls neolitics en las muntognas u en valladas situadas ad aut sco per exempel maneras da crap, utensils da silex e da cristall. Tut quests chats derivan plitgansch da chatschaders u da pasters e na fan strusch part da culegnas.

# TEMP DA BRONZ

2200 – 800 avant Cristus

Entant che utensils d'arom eran gia cumparids en la fasa tardiva dal temp da crap tardiv, èn ussa da nov iseglia ed armas vegnidas construidas da bronz. (Bronz è ina lega d'arom e da zin).

Cun il temp da bronz tempriv ha cumenzà ina nova colonisaziun intensiva dal territori alpin grischun. Las paucas culegnas dal temp da crap tardiv èn vegnidas remplazzadas da tschuncanta fin sessanta culegnas che han existì pli ditg. Ellas n'èn betg mo vegnidas erigidas en las valladas bassas, mabain er en vals autalpinas (Lumnezia, Surses, Engiadina). Questas novas colonisaziuns dastgassan bain avoir lur raschun en la scuverta da minerals d'arom sin territori grischun. La nova tecnica d'elavurar arom ha laschè nascher novas activitads. Latiers tutgan la prospecziun d'arom, las minieras, l'exploraziun d'arom, il cular bronz e.u.v. Quai dastgass avoir chaschunà in commerzi pli intensiv sur ils pass da las Alps e la finala tscherts midaments da las structuradas socialas.

Ils abitants da las vischnancas dal temp da bronz eran purs. Els sa nutrivan da la cultivaziun dad ers (furment, furment d'in graun, furment dubel, spelta, ierdi e.u.v.) e da l'allevament da muvel. La chatscha giugava mo pli ina rolla fitg secundara.

En il temp da bronz tempriv e mesaun e per part anc en il temp da bronz tardiv è vegnida vivida – sin basa da furmas da cheramica spezialas – ina cultura

independenta sin territori grischun. Pli baud vegniva ella numnada la «cultura da Crestaulta», ozendi la «cultura interalpina dal temp da bronz». Ella sa differenziescha cleramain da las culturas sidalpinas e nordalpinas.

En il decurs dal temp da bronz tardiv (13.–9. tschientaner avant Cristus) è questa «cultura interalpina dal temp da bronz» evidentamain vegnida stgatschada. Novas culturas èn da quest temp avanzadas en il territori alpin grischun. Ellas han chaschunà ina tripartiziun culturala che sa lascha demussar fitg bain er anc en il temp da fier.

**Culegnas** Culegnas dal temp da bronz sa chattavan per regla sin muttas, sin strivlas da grip marcantas e sin terrassas da costas che pudevan vegnir defendidas bain. Culegnas en il funs da la val paran da cumparair pir en il temp da bronz tardiv. A Savognin-Padnal è la culegna vegnida erigida en ina foppa natirala d'ina profunditad da 2 fin 3m, a Cazas-Cresta schizunt en ina sfessa dal grip d'ina profunditad da 5 fin 6m. A Falera-Muota sa chattava la culegna tranter gronds blocs da crap. Ella è stada fortifitgada cun in mir da tschinta. Quai lascha supponer ch'ils emprims abitants da questa culegna avevan in grond basegn da sa proteger.

En culegnas ch'èn exchavadas bain sa laschan cumprovar construcziuns cun pitgas verticalas u construcziuns da travs cun fuclars u schizunt entiras structuradas d'abitadi. La cisterna da Savognin-Padnal e la tschiffada d'aua da funtauna da San Murezzan èn perditgas d'ina tecnica da construcziun en lain fitg sviluppada. Ils edifizis d'abitar èn per regla vegnids construids en lain da laresch. Lain da pign è vegnì duvrà oravant tut sco material d'arder. Las culegnas han per part survivì plirs tschient onns u schizunt pli che milli onns. En culegnas pitschnas vivevan 20 fin 30 personas, en culegnas pli grondas 50 fin 100 personas.

**Objects chattads en fossas** Dal territori alpin grischun èn enconuschents mo paucs objects ch'èn vegnids chattads en fossas dal temp da bronz. A Donat-Surses èn vegnids chattads ils onns 1926 e 1961 sis sarcofags cun skelets. Ils objects agiuntads a la fossa dateschan d'in temp da bronz tardiv (17./16. tschientaner avant Cristus). En cas da la renumada «fossa da cupla da Donat» dastgassi però sa tractar d'in tschaler d'arviet medieval (crot) che ha donnegià ina fossa dal temp da bronz tempriv.

Ulteriuras fossas cun skelets dal temp da bronz tempriv senza objects agiuntads a la fossa datti er a Laax-Saluns. D'ina impurtanza fitg gronda èn indesch fossas a cremaziun da Lumbrein-Surin-Cresta Petschna. Tut las fossas èn fossas da dunnas che appartegnan evidentamain a la culegna da Crestaulta. Ellas tuttas cuntegnan ritgs supplements da cliniez. Ellas dateschan dal temp da bronz tempriv (16./cumenzament dal 15. tschientaner) e cumprovan l'influenza da la cultura da tiembels.

Dal temp da bronz tardiv è enconuschent in santeri cun urnas a Fläsch-Answiesen ch'è displaschai-vlamain destrui fermamain ed ina fossa d'ina dunna a Domat. Questa ultima cuntegneva ina fivla d'artg da derivanza meridiunala, ureglins ed in pau cheramica.

**Chats en las muntognas ed en las auas** Numerus èn ils chats singuls ch'èn vegnids fatgs en las muntognas u sin ils ospizis dals pass. I pudess sa tractar da chaussas che chatschaders u pasters han pers. Quests chats èn forsa er ina perditga d'ina economia d'alp dal temp da bronz. En singuls cas pudessi er sa tractar d'unfrendas ad ina divinitad da muntogna.

Gist uschè savens èn vegnids chattads per exempel spadas, lantschas ed autras chaussas en auas, en flums, en lais u er en regiuns da funtaunas. Sch'i sa tracta en quest connex d'objects pers u d'unfrendas ad ina divinitad d'aua n'è betg cler. Duas maneras u sigirs da bronz tar ina funtauna sur Rueun u plirs chats da spadas, in stilet ed ina gluva en la tschiffada d'aua da funtauna da San Murezzan Bogn èn forsa stads unfrendas ad ina divinitad da funtauna.

La tschiffada d'aua da funtauna da San Murezzan è in indriz ch'è fitg interessant or dal puntg da vista da la construcziun en lain. Ella consista d'ina chascha ch'è construida cun laina radunda e d'ina chascha ch'è construida cun aissas, plinavant da dus bischens verticals a l'intern sco er d'ina pitga da raiver. Tut è fatg en lain da laresch e datescha da la mesadad dal 15. tschientaner avant Cristus.



**Cliniez** En il temp da bronz èn fitg savens vegnidas duvradas gluvas da bronz per tegnair ensemen la vestgadira. Uschia han ins serrà la taila da glin grossa. Dapi il temp da bronz tardiv han fivlas remplazzà las gluvas da bronz. Sco ulteriurs objects da decoraziun enconuschevan ins bratschlets ed anels, culaunas cun ambras e cun rollinas da bronz u cun rudellas cun pizs. Buttuns d'oss e da bronz èn bain vegnids cusids sin la taila. L'intent d'utilisaziun da las rosas da corna da tschierv è intschert. La lamella cun dents da ver vegniva forsa duvrada da l'artger sco platta per proteger il maun.

L'object da chat il pli impurtant è la gluva cun palutta da Falera-Muota. Ella è ornada ritgamain ed ha ina lunghezza dad 85cm. Pervia da sia lunghezza èsi pauc probabel ch'ina dunna l'haja purtada. Ella pudess esser vegnida duvrada sco object da cult u da prestige, per exempel per decorar ina statua da lain.

Cliniez da bronz e d'ambra è stà in privilegi da la classa sociala superiura. Metter il cliniez en la fossa dueva segirar la posiziun sociala da la persuna defuncta en l'auter mund. I deva segiramain er cliniez da materials pli simpels che n'è però betg sa mantegnì.

## CHATS E FATGS ARCHEOLOGICS Ina curta cronologia

a partir da 773/774

6.–8. tsch.

6.–cumenzament

9. tsch.

ca. 536/537

5. tsch.

451 s. C.

### Temp medieval tempriv (400–800 s. C.)

Integraziun da la Rezia en l'imperi da Carl il Grond

Domini dals Zaccons/Victorids en Currezia

Terminaziun dal process da cristianisaziun  
(destrucziun dal cuvel da cult sper Ziràn)

Integraziun da la Rezia en il reginavel merovingic dals Francs

Cumenzament da la construcziun da baselgias cristianas temprivas

Emprima menziun d'in uestg a Cuir (Asinio)

### Epoca romana (15 a. C. – 400 s. C.)

Tumults politics, construcziun d'abitadis alpins

Il cristianissem daventa religiun statala, scumond da cults pajauns

Cuir daventa presumadamain chapitala da la provinza  
«Raetia prima»

3.–4. tsch. e pli tard

a partir da 395

1. mesadad dal

4. tsch.

a partir dal 1. tsch.

Construcziun da las rutas da commerzi tranter nord e sid  
(vials da chars sin il Güglia)

15 a. C.

Conquista da la Rezia tras ils Romans  
(chats d'objects militars en il territori dal Set e dal Crap Ses)

### **Temp da fier (800–15 a. C.)**

800–15 a. C.

Elavuraziun da fier, pli e pli minieras, emprimas funtaunas  
scrittas e munaida

### **Temp da bronz (2200–800 a. C.)**

2200–800 a. C.

Colonisaziun pli e pli intensiva, elavuraziun da bronz e da vaider

### **Temp da crap (600000–2200 a. C.)**

5. millenni a. C.

Chatschaders e collectaders d'aventan sesents, cultivaziun dad  
ers e tratga da muvel, emprims vaschs da terracotga, arom,  
invenziun da la roda

ca. 10000 a. C.

Emprims fastizs d'activitads umanas en il Grischun (Cuir-Marsöl)

# TEMP DA FIER

800 – 15 avant Cristus

Il temp da fier vegn dividì en ina fasa pli veglia (temp da Hallstatt) ed en ina fasa pli giuvna (temp da Latène). En il temp da fier ha il fier cumenzà a s'etablir sco materia prima. Utensils ed armas da bronz èn adina pli savens vegnids remplazzads tras artefacts da fier. Il fier ha gronds avantatgs: el è resistant ed elastic ed è da chattar bler pli savens che arom en il territori alpin. Bronz è però vegnì duvrà vinavant per cliniez. L'elavuraziun da fier pretendeva grondas enconuschientschas tecnicas. Spezialists sco miners, culaders da fier e ferrers èn stads necessaris. Furns da luentar e fuschinas han stuì vegnir construids.

Il commerzi sur ils pass da las Alps ha giugà vinavant ina gronda rolla. Per l'emprima giada è la scrittira cumparida, en il temp da fier tardiv er l'economia monetara.

Il maletg da las culegnas dal temp da fier correspunda per gronda part a quel dal temp da bronz. Dapi il temp da bronz tardiv hai dà en il Grischun – bain pervia dal squitsch da l'exteriur – ina tripartiziun culturala. Quella è percorschibla cleramain durant tut il temp da fier.

**Ils Rets** En il temp da bronz tardiv ed en il temp da fier pli tardiv sa chattan en il sidost dal Grischun (Engiadina bassa, Val Müstair) perditgas da la cultura da Laugen-Melaun. Ses caracteristicum che definescha la cultura è la cria cun manetschs da Laugen-Melaun. Ella sa chatta en il Trentino, en il Tirol dal sid ed en l'Engiadina bassa e mo sporadicamain en la Val dal Rain alpin. Abitadis tipics èn Ramosch-Mottata, Scuol-Munt Baselgia ed Ardez-Suotchasté. A Scuol-Motta Sfondraz ed a Zernez-Brail-Funtanatschas sa chattan – sin gronds mantuns da crappa – probablamain plazzas per arder unfrendas che valevan sco plazzas da cult.

La cultura da Laugen-Melaun vegn remplazzada tras la cultura da Fritzens-Sanzeno ch'è caracterisada da cuppas pitschnas e da crias cun manetschs. A Scuol-Russonch sa chatta ina tipica piazza per arder unfrendas. Latiers tutgan fuclars ed ossa d'animals chaltschinada, vul dir brischada fermamain. Il center da la derasaziun da la cultura da Fritzens-Sanzeno sa chatta er en il Trentino, en il Tirol dal sid e dal nord ed en l'Engiadina bassa. Tant ils purtaders da la cultura da Laugen-Melaun sco er quels da la cultura da Fritzens-Sanzeno vegnan identifitgads ozendi cun ils Rets istorics.

**Ils Celto-rets ed ils Celts** En il Grischun dal nord ed en il Grischun central sa fa valair dapi il temp da bronz tardiv la cultura da santeris d'urnas (Cuira-Karlihof, Vella-Pleif e.u.v.). Ella s'avanza cleramain nà dal nord. En il Grischun dal nord vegn ella surpostada d'in element da la cultura da Laugen-Melaun (cultura maschadada celto-retica). Dapi il temp da fier pli tardiv sa mussan cleras influenzas da la cultura da Hallstatt (Favugn-Felixwingert, cheramica picturada da Tumein). Cun la cheramica da Tumein e da Schneller (gruppas da la Val dal Rain alpin), cun la cheramica cun structura da petgen e pli tard cun la cheramica naira sa manifestescha er en il temp da fier pli giuven cleramain l'influenza celtica dal nord.

Ils elements da Laugen-Melaun dal temp da bronz tardiv ch'èn arrivads sur il Vorarlberg en il Grischun dal nord regordan anc a la cultura retica. Dapi il temp da fier dominescha senza dubi l'element celtic. Per il Grischun dal nord èn avant maun tant las restanzas d'abitadi respectivas (Cuira-Welschdörfli, Fläsch, Lantsch/Lenz, Suraua, Trun-Darvella e.u.v.) sco er chats da fossa (Tumein-santeri d'urnas, Trun-Darvella e.u.v.). L'element retic svanescha en quest temp praticamain dal tutfatg.

**Ils Leponts** En il sidvest dal Grischun (Mesauc, Val Calanca, Bregaglia) datti dapi il temp da bronz tardiv adina daplì indizis per ina cultura tessinaisa-lumbarda da Canegrate. En il temp da fier pli tempriv sco er pli tardiv fa la regiun dal sidvest dal Grischun senza dubi part da la cultura da Golasecca. Quella è caracterisada d'ina gronda ritgezza da chats oravant tut en ses inventaris da fossa. Uschia existan dal champ da fossas da Mesauc-Coop fossas cun skelets e fossas d'urna cun ritgs cliniezs da fivlas. En las fossas cun skelets da Castaneda e da Cama sa chattan da l'autra vart bler cliniez da fivlas, penderliezs, ureglins, culaunas d'ambra, situlas (sadellas), chantas cun pichel, spadas da fier, crias, magiels e.u.v.

Perquai ch'i na dat naginas materias primas en il Mesauc, sa tschenta la dumonda danunder che questas ritgezzas derivan. Ins suppona che la val haja giugà ina rolla da mediatu en il temp da fier per il commerzi sur ils pass da las Alps tranter il territori etrusc ed il territori nordalpin. Cumpareglia cun ils chats en las fossas èn ils chats en ils abitadis plitgusch modests. Dals auturs romans temprivs vegnan ils purtaders da questa cultura designads sco Leponts.



## **Commerzi dal temp preistoric e dal temp roman**

Gia per il temp da crap tardiv sa lascha cumprovar in tschert commerzi da barat. Uschia han ins chattà utensils da silex dal Giura franzos, dal Lägeren (ZH) e dals Monti Lessini (Trentino).

En il temp da bronz existiva in commerzi prosperant sur ils pass da las Alps (produenziun da bronz, commerzi da zin, ambra, recipients da chericamica e.u.v.). En il temp da fier è vegnì intensivà il commerzi tranter il territori etrusc ed il territori nordalpin. En il Grischun dal nord èn cumparidas furmas da cliniez sidalpinas. Per l'emprima giada èn vegnidas chattadas munaidas. Dal territori da la Germania dal sid è vegnì importà sal.

Dal temp roman hai dà in traffic da rauba intensiv sur il pass dal Güglia. Vaschella da terra sigillata è vegnida en il Grischun. Vaschella da lavetsch da l'Italia dal nord, da la Bregaglia e dal Mesauc è vegnida vendida da Cuir fin Bregenz ed Augsburg. Ieli d'ulivas da la Spagna, vin da l'Italia, fritgs meridionals, austras, tailas e spezarias èn vegnids importads. Muaglia, graun, mel e tschaira, rascha, cristals da muntogna, chaschiel d'alp e mantels da launa èn vegnids exportads vers sid. La rait da vias dastgass esser stada en in bun stadi a partir da la mesadad da l'emprim tschientaner suenter Cristus. L'economia monetara ha remplazzà adina pli fitg il commerzi da barat originar.

# TEMP DALS ROMANS

15 avant Cristus – 400 suenter Cristus

Enturn ils onns 16/15 èn las truppas romanas sut l'imperatur Augustus avanzadas vers nord. L'operaziun da zanga è vegnida cumandada dals dus generals Tiberius e Drusus nà da la Gallia e dal Trentino. Ina terza unitad d'armada dastgass esser avanzada da Com ora sur il pass dal Set tras il Surses e la Val dal Rain alpin. Perditga da quai dattan chats da militaria, oravant tut plums da schlingia sin il pass dal Set ed en la regiun dal Crap Ses. En in'acziun d'assagl da stad da 4 mais è vegnì suttamess il territori alpin dal Vallais fin a Baviera. L'intent da questa campagna militarà è bain stà quel da segirar ils pass da las Alps e da stgaffir novas basas en il nord da las Alps.

Ina provinza Raetia cun Augsburg sco chapitala è vegnida fundada pir vers la mesadad da l'emprim tschientaner suenter Cristus. La provinza è vegnida dividida enturn l'onn 300 en ina Raetia prima (bain cun Cuir sco chapitala) ed en ina Raetia secunda (cun Augsburg sco chapitala).

Cun la conquista romana hai dà grondas midadas culturalas. Empè da las construcziuns da lain vertentas èn vegnidas fatgas ussa construcziuns da crap grondas en la tecnica da maulta da chaltschina. Las chasas da crap han ussa survegnì pli savens picturas da paraid, stgaudaments d'ipocaust (aria chauda) u da chanal ed en stadas cuvertas da schlondas u er da quadrels. Igl èn vegnids construids

implants da termas, tempels, teaters ed ulteriurs edifizis publics. Er la populaziun indigena ha cumprà vaschella da terra sigillata ritgamain decorada e rauba importada dal sid sco fritgs meridionals, ieli d'ulivas, vin ed autras chaussas.

Bainbaud avevan singuls indigens emprendì la lingua e la scrittira latina. L'economia monetara romana è vegnida introducida gist uschè sco – entaifer in temp relativamain curt – l'aduraziun da divinitads romanas. Il latin ha stgatscha en il decurs dals tschientaners las linguas indigenas (il celtic ed il retic). Quellas vivevan vinavant mo en vettas fundamentalas surpostadas. Igl è resultà ina spezia da «latin vulgar» u da «retolatin», or dal qual igl è sa sviluppà la finala il rumantsch vegl ed il retorumantsch.

**Cuira dal temp roman** Dal Welschdörfli da Cuira deriva ina inscripziun ch'è deditgada a Lucius Caesar, in funcziunari roman aut. Ella lascha supponer che Cuira è stà in center administrativ gia dal temp roman tempriv. Ils emprims edifizis d'abitar èn bain anc stads construids en lain. A partir dal 1. tschientaner suenter Cristus ha cumenzà ina viva activitad da construir edifizis en crap. Igl èn vegnidas construidas numerusas chasas cun stgaudaments ipocausts e da chanal. En l'areal Ackermann hai dà in albiert cun picturas da paraid e cun pussaivladads da pernottar. En il sector da la piazza da la Stadthalle sa chattava in grond implant termal, bain er il martgà ed in sanctuari.

Suenter la refurma diocleziana da l'imperi enturn l'onn 300 è Cuira bain daventà la chapitala da la provinza Raetia prima. Almain dapi il 4. tschientaner sa chattava sin la curt a Cuira in abitadi roman ch'era segirà cun mirs fortifitgads. Dapi il 5. tschientaner èn cumprovas sin la curt ina sedia episcopala ed ina baselgia sepulcrala. En il Welschdörfli sa chattavan da quel temp anc singuls edifizis d'abitar ed in implant ecclesiastic cristian tempriv cun in banc dals sacerdots.

**Abitadis e sanctuaris romans** Sper la Curia romana sa chattavan numerus abitadis pli pitschens en il Grischun. Uschia devi staziuns da via sco la Mutatio da Riom u l'abitadi da Mon-Crest'Ota, tuts dus sin la ruta charrabla dal Gügli. Impurtanta era er la staziun da duana dal temp roman tardiv a Bondo-Murus/Castelmur. Plinavant existivan plirs abitadis fortifitgads sco ina spezia da champ militar dal temp roman tardiv fin al temp medieval tempriv. Latiers tutgavan per exempel Casti-Kirchhügel, Castiel-Carschlingg, Casti, Vicosoprano-Caslac e bain er Maladers-Tummihügel-vest e Sagogn-Schiedberg.

Sanctuaris romans èn per exempel quel sin il Gügli, il cuvel da cult a Ziràn, la piazza per arder unfrendas a Fläsch-St.Luzisteig. Auters cumplexs da chats che tiran endament abitadis e chats da fossas derivan dad Andeer, da Cazas-Riòlta Bassa, da Sevgein, da Tumein, da Trimmis u da la basa militara dal temp roman tempriv sin il pass dal Set. Chats da fossas e champs da fossas impurtants enconuschain nus da Panaduz-Valbeuna, da Roveredo-Tre Pilastri, da Cama, da Sta.Maria en Calanca e da la chavorgia da Calfreisen. Els inditgeschan tuts ina spesseggia d'abitadis remartgabla dal temp roman.

# TEMP MEDIEVAL TEMPRIV

400 – 800 suenter Cristus

En il decurs dal 5. tschientaner èn las truppas romanas sa retratgas per part da la Rezia. Il territori alpin retic è – sco bastiun cunter ils Germans – daventà domini ostrogotic. Suenten la mort da Teoderic (527) è la Raetia prima, respectivamain l'uestgieu da Cuira, crudà pli fitg sut l'influenza dals Francs. Il 4./5. tschientaner è vegnida cristianisada la Raetia prima. Dapi l'onn 451 è cumprovada ina sedia episcopala a Cuira. Dapi il 6. tschientaner aveva la schlattaina dals Zaccons e dals Victorids indigens la pussanza ecclesiastica e seculara en Currezia. Sut Carl il Grond ha la Currezia pers l'indipendenza politica enturn ils onns 773/74. Ella è vegnida integrada definitivamain en il reginavel francon.

Dal temp medieval tempriv èn vegnids perscrutads enfin ussa mo relativamain paucs abitadis. La gronda part è creschida or da culegnas dal temp roman tardiv ed or d'implants da chastels, uschia Castiel-Carschlingg, Maladers-Tummihügel, Aschera-Chrea, Casti, Riom-Cadra u Zernez. Quai ha da far cun il fatg che quests abitadis dal temp medieval tempriv sa chattan per gronda part sut vischnancas actualas e ch'els n'èn – sco construcziuns da lain – betg fitg bain vesaiVELS e percurschibels. Mo baselgias, implants da claustras ed edificis signurils (curt roiala a Zizers) èn vegnids construids vinavant en crap e cun ina liadira da maulta. Las numerusas baselgias dal



temp medieval tempriv cumprovan però ina gronda  
spessezza da la populaziun en il Grischun.

Ultra da quai datti bleras fossas e blers champs  
da fossas dal temp medieval tempriv. Ellas na  
cuntegnan per regla nagins objects da fossa u  
mo objects da fossa modests. Latiers tutgan per  
exempel il champ da fossas dal temp roman tardiv  
e dal temp medieval tempriv Valbeuna a Panaduz  
cun passa 700 fossas, ils santeris da Son Stefan a  
Cuir a u da l'iert da la chasa-pravenda a Schiers.  
Fin il 7./8. tschientaner pon anc vegnir cumprovadas  
plazzas da cult pajaunas en il territori alpin grischun,  
sco per exempel en il cuvel da Ziràn.

En il temp medieval tempriv dastgass la romanisa-  
ziun linguistica sco tala esser stada terminada en  
il Grischun.

«En l'archeologia sa mussa la vart absurda da l'istorgia.  
L'archeologia reconstruescha quai che l'istorgia ha destrui.»  
(Friedrich Dürrenmatt, 1921–1990)

## **Impressum**

Exposiziun permanenta «Chats e fatgs archeologics» al plaun sutterran.

Concepì e producì da las collavuraturas e dals collavuraturats dal museum retic, en collavuraziun cun las firmas executivas

Cussegliaziun specifica e texts:

**Servetsch archeologic dal Grischun,  
Jürg Rageth**

Concepziun da l'exposiziun:

**gasser, derungs Innenarchitekturen**

Mesiras architectonicas:

**Uffizi da construcziun auta dal Grischun  
Rudolf Fontana & Partner SA**

Translaziuns:

**Chanzlia chantunala dal Grischun  
Jane Gillespie-Casparis**

L'exposiziun è vegnida finanziada tras credits administrativs dal chantun Grischun sco er tras meds da la fundaziun Museum retic e dal fond da la citad da Cuir a entaifer questa fundaziun.

Il museum retic engrazia per las donaziuns, per ils emprests, per las infurmaziuns e per ils sustegns multifars en connex cun la realisaziun da questa exposiziun.

STEIN

RÄT

ALPENP

HEILIG

Mardi fin dumengia 10 – 17 Uhr

Rätisches Museum  
Museum retic  
Museo retico

Hofstrasse 1, 7000 Chur  
Telefon 081 257 48 40  
[www.raetischesmuseum.gr.ch](http://www.raetischesmuseum.gr.ch)